

TEZAUUR LITURGIC
11 OCTOMBRIE

ACATISTUL
SF. CUVIOS
LEON
NAGOLKIN
DE LA OPTINA



MOSCOVA, 2000



АКАФИСТ ПРЕПОДОБНОМУ И БОГОНОСНОМУ ЛЬВУ, СТАРЦУ ОПТИНСКОМУ

Кондак 1

Избранному начальнику преподобных отцев, богомудрому Льву Оптиному, старчество в Оптиной пустыне насадившему и диавола всеконечне победившему, похвальная принесем пение, ты же от бед избави нас, отче преподобне, любовью тебе зовущих:

Радуйся, отче Льве, старчества оптинского главизно.

Икос 1

С преподобным преподобен будеши и со избранным избран явишися, сие помыслив, отче Льве, мира отрекся еси и обручился иноческому званию. Таковое произволение твое похваляюще сие тебе вопием:

Радуйся, Христов последователю избранный.

Радуйся, вечери таинственныхя рачителю.

Радуйся, елей уготовивый изрядным
доброделанием.

Радуйся, светильник душевный возжег
боголюбием.

Радуйся, яко в брачную ризу облеклся еси
смирением.

Радуйся, яко рубища страстей совлеклся еси
послушанием.

Радуйся, яко мирскую возненавидел еси суету
безплодную.

Радуйся, яко иноческую возлюбил еси тишину
многоплодную.

Радуйся, яко Ангельскаго делания явился еси
причастник.

Радуйся, яко Апостольскаго предания явился еси
хранителю.

Радуйся, на Браке Агнчем вкусивый трапезу
сладчайшую.

Радуйся, вином умиления напоивый душу
безстрастную.

Радуйся, отче Льве, старчества оптинскаго
главизно.

Кондак 2

На Бога всю надежду возложив и крест твой
взем, отче Льве, житие сопротивобесовское
дерзнул еси проходить преподобне, мужеством
души твоя сластей страстных волны усмирил
еси, Христу молитвенно поя: Аллилуия.

Икос 2

Терпением облеклся еси, богомудре отче,
иноческое житие яко ангельский чин восприял
еси, труды и болезни, тяготы и беды легче
понесл еси окрыляем послушанием, сего
ради зовем ти:

Радуйся, монашескаго любомудрия
присносветлый светильниче.

Радуйся, безмолвначескаго жития истовый
любителю.

Радуйся, светлая свеще молитв неусыпаемых.

Радуйся, лампадо неугасимая бдений
непрестанных.

Радуйся, яко огонь ко огню прилагал еси рачение.

Радуйся, яко неослабно восходил еси
по лестнице духовнаго восхождения.

Радуйся, постничества постоянное желание.

Радуйся, трудолюбия твердое понуждение.

Радуйся, псалмопения всегдашнее любление.

Радуйся, ума непрестанное хранение.

Радуйся, яко на высоту столпа возшел еси самоотвержения.

Радуйся, яко во глубину снишел еси самоукорения.

Радуйся, отче Льве, старчества оптинского главизно.

Кондак 3

Огнедохновенное евангельское слово слышал еси отче, яко ученик в меру учителя приходит, потщался еси взыскати учителя молитвы умныя, да к совершенному единению с Богом приведет тя, и обрет Феодора яко дар Божий, благодарне возопил еси Богу: Аллилуия.

Икос 3

Адаманта крепчайшее житие Феодора, бысть тебе, отче Льве, яко обретение сокровища многоценнаго, емуже последуя житию и учению душу снабдил еси дарами благодати многоцелебныя. Сего ради целиши и богатиши вопиющия тебе таковая:

Радуйся, богатство тленное ни во что же вменивый.

Радуйся, сокровище непреходящее на небеси
стяжавый.

Радуйся, златоукрашенная двери таин
церковных.

Радуйся, златокованный ключу таинств
духовных.

Радуйся, отверзаяй вход молитве умней.

Радуйся, затворяяй вход страстем безумным.

Радуйся, учениче благий и верный.

Радуйся, хранителю Паисьевых учений.

Радуйся, благоумиленное к молитве прилежание.

Радуйся, благодерзновенное страстей
умерщвление.

Радуйся, светоче добродетелей Божественных.

Радуйся, источниче даров духовных.

Радуйся, отче Льве, старчества оптинского
главизно.

Кондак 4

Ко источнику притекл еси Божественных
писаний, яко елень жаждущий, и струями
святоотеческих учений напоил еси душу твою,
богомудре Льве. Сего ради жажду утолил еси

многих людей, приходящих к тебе,
в благодарности зовущих Богу, Аллилуия.

Икос 4

Разумно вшел еси в пристанище безмолвия яко
в Божественное покоище, идеже со блаженным
Феодором яко земный ангел непрестанно
беседовал еси ко Христу. Мы же зряще тя яко
небеснаго человека, приносим тебе похвалу сию:

Радуйся, горлице пустыннолюбивая, Христа
взыскующая.

Радуйся, птенче орлиный, обновивый юность
твою.

Радуйся, Богозвонкую возлюбивый тишину
Ангельскую.

Радуйся, злошумнаго удаливыйся мятежа
страстей.

Радуйся, яко Херувим носил еси Бога, в тебе
почивающаго.

Радуйся, яко Серафим зрел еси тайны, в сердце
твоем являющиеся.

Радуйся, яко Солнце возшел еси, в пустыне
изсушай корения страстей.

Радуйся, всенощными бдении твоими яко
полная луна разторгнул еси тьму вражиих сетей.

Радуйся, безмолвия столпе непоколебимый.

Радуйся, подвижничества основание
неиспровержимое.

Радуйся, постничества похвало изрядная.

Радуйся, пустынножительства тишино
домовитая.

Радуйся, отче Льве, старчества оптинского
главизно.

Кондак 5

Остров Валаам яко пристанище от мирския
молвы избрал еси, отче, вонъже вселился еси
со блаженным Феодором, идеже куплю духовную
деяв, златом смиренномудрия многих богатыя.
Темже обнищавшия ны смирением ко острову
покаяния приведи твоими молитвами, Богу
вопити: Аллилуия.

Икос 5

Целомудрием украсился еси отче Льве, яко
препоясан был еси подвижничеством,
в схиму же великую яко в ангелоподобную силу
облеклся еси, Ангельския обвеселяя чины. Сего
ради монашества красота на тебе изобразися,
мы же тя яко наставника иноческих чинов
похваляем сице:

Радуйся, куколем незлобия покрывыйся.

Радуйся, в мантию любомудрия облекийся.

Радуйся, параман на себе возложив терпения.

Радуйся, препоясавыйся поясом сугубого рачения.

Радуйся, сандалии обувый благовествования миру.

Радуйся, щитом послушания стрелы вражия отразивый.

Радуйся, мечем молитвенным полчища демонския сокрушивый.

Радуйся, богодарованное разсуждение яко свещу неугасимую вжегл еси.

Радуйся, яко на крест сугубым отречением от мира возшел еси.

Радуйся, яко в нищете духовной пожил еси.

Радуйся, богатство нестяжания.

Радуйся, мира поправление.

Радуйся, отче Льве, старчества оптинскаго главизно.

Кондак 6

Монахов наставника и мирян утешителя, яви
тя Бог в стране Россистей, отче преподобне
Льве, и страждущим целителя и бесов

прогонителя и от всяких зол избавителя людей к тебе с верою притекающих и поющих Богу: Аллилуия.

Икос 6

Егда в Оптину Пустынь пришел еси отче Льве, якоже в вертоград богонасажденный, тогда яко делатель премудрый водрузил еси столп старческаго окормления и молитвенную ограду и точило

смирения по евангельскому слову, сего ради пустынь процвете хвалами тебе славословящи:

Радуйся, Моисею и Антонию сподвижнице богодарованный.

Радуйся, Филарету иерарху друже и наставнице избранный.

Радуйся, Макарию смиренномудрому вождю боговдохновенный.

Радуйся, Исаакию препростому пророче богооткровенный.

Радуйся, Феодора блаженного учениче благопослушный.

Радуйся, Паисиева любомудрия лиро вдохновенная.

Радуйся, отеческих изречений книго
одушевленная.

Радуйся, Амвросия благословеннаго из полы
в полу Макарию предавый.

Радуйся, святоотеческими наставленьми его яко
отец чадолюбивый наказавый.

Радуйся, святителя Игнатия богомудрый
воспитателю.

Радуйся, в новоначалии его уроков смирения
подателю.

Радуйся, многия чада твоя к Богу приведый.

Радуйся, отче Льве, старчества оптинскаго
главизно.

Кондак 7

Поселился еси в пчельнице скита яко пчела
люботрудная, нектар подвижнических трудов
твоих в делех и чудесех являя и поучении
своими чада твоя питая, любовью вопиющия
Богу: Аллилуия.

Икос 7

Мед умнаго делания в сердце твоем собрал еси
богомудре отче, яко Иисусово сладкое имя бысть
тебе утешения источник, имже горечь страстей
на сладость добродетелей преложил еси,

понуждением духовным. Сего ради сладкия соты похвалы тебе приносим:

Радуйся, Ангелом сладкое пение.

Радуйся, демоном горькое воспоминание.

Радуйся, цветниче целомудрия духовнаго.

Радуйся, Раю молитвословия церковнаго.

Радуйся, умныя молитвы делателю боговдохновенный.

Радуйся, сердечнаго умиления носителю всеблаготворительный.

Радуйся, яко слезныя струи источил еси всецелебныя.

Радуйся, яко благодатию просветил еси души вождение.

Радуйся, непрестанное памятование о Бозе.

Радуйся, пламенеющая любви в Дусе.

Радуйся, медоточная словеса источаяй

Радуйся, сладкозрение чадом твоим.

Радуйся, отче Льве, старчества оптинскаго главизно.

Кондак 8

Оптинскому старчеству явился еси яко
благомасленный кореню, елеем намащяя учений
твоя ученики и от лампы присногорящя
помазанием целя недужныя, в радости поющя
благодарно Богу: Аллилуия.

Икос 8

Слава подвигов твоих промчяся по лицу земли
российския и заря чудес твоих облиста концы
ея, сего ради притекаху целитися к тебе бесныя
и недужныя, вопиюще тебе сия:

Радуйся, недугов избавление.

Радуйся, грехов разрешение.

Радуйся, врачевание болезней
неудобоисцелимых.

Радуйся, освобождение от вериг неудобносных.

Радуйся, быстрое пременение скорби
на радость.

Радуйся, скорое исцеление раковыя язвы.

Радуйся, одержимых от бесов избавляяй.

Радуйся, отчаянным отраду подаваяй.

Радуйся, безнадежным веру возвращаяй.

Радуйся, елеем от лампы исцеляяй.

Радуйся, яко тобою здравие получаем.

Радуйся, яко тобою уныние побеждаем.

Радуйся, отче Льве, старчества оптинского главизно.

Кондак 9

Ходяй яко лев диавол и рыкай кого поглотити, яко виде тя отче Льве, облеченнаго благодатию Пресвятаго Духа, ужасеся и трепетен бысть и яко пес худый от стада твоего отбеже, силою гонимый твоего к Богу дерзновения, имже взывал еси: Аллилуия.

Икос 9

Лукавый совет сотвори демон и гонения на тя воздвиже отче Льве, ты же беды добльственне вся претерпел еси, глаголя: «Аще в ссылку пойду, аще во огонь, аз буду тойже Леонид, присно величаяй Бога». Мы же мужеству твоему дивящися сиче вопием:

Радуйся, несокрушимый адаманте.

Радуйся, небоявленный столпе.

Радуйся, горо несекомая скорбями.

Радуйся, высото неземныя радости.

Радуйся, правды ради гонимый без правды.

Радуйся, лжесвидетели оклеветанный.

Радуйся, кленущия тя благословляяй.

Радуйся, обидящим тя благодворяй.

Радуйся, незлобием твоим Христу подражаяй.

Радуйся, злобных демонов в бездну ввергаяй.

Радуйся, смиренный лев – от Феодора нареченный.

Радуйся, блаженства гонимых за Бога причастниче.

Радуйся, Вышняго Иерусалима достойный наследниче.

Радуйся, отче Льве, старчества оптинского главизно.

Кондак 10

Верен Богу пребыл еси отче Льве даже до смерти, отеческия заветы со опаством храня, аще и оклеветан был еси яко неверен, но чистым исповедание твое православным показа. Сего ради яко избранный сосуд Церкви Русския явился еси и гусль Богу поющая присно:

Аллилуия.

Икос 10

Ангелоподобное житие твое, отче Льве, вписанное в небожители и богодарованное разсуждение твое над многими людьми постави ты в руководителя. Сего ради от многих бед и заблуждений избавил еси паству твою, любовь тебе поющую:

Радуйся, пастырю наш добрый.

Радуйся, словесных питателю овец.

Радуйся, неудоборешимых вопросов разъяснение.

Радуйся, неудободержимых страстей усмирение.

Радуйся, яко прелести путы яко паучину растерзал еси.

Радуйся, яко разума духовнаго стези сказал еси.

Радуйся, смиренномудрый врагов примирителю.

Радуйся, заматоревшия гордыни искоренителю.

Радуйся, забытых грехов обнаружение.

Радуйся, сокрытых талантов явление.

Радуйся, яко тобою исцеляются язвы неисцельныя.

Радуйся, яко тобою изсушаются слез источницы.

Радуйся, отче Льве, старчества оптинского главизно.

Кондак 11

Ароматами молитвы твоея умно-сердечныя облаговони чада твоя, тебе поющия, и вложи в наша сердца молитву благодарованную, да славим Господа Иисуса Христа, непрестанно вопиюще: Аллилуия.

Икос 11

Возжегл еси в души твоей светильник молитвы умныя, от неяже вся благая приял еси, яко делатель был еси смиренномудрый. Темже настави и нас на стезю сию тесную обаче благодати исполненную, вопиющих тебе сия:

Радуйся, делателю непрелестный.

Радуйся, подвижниче неленостный.

Радуйся, светлая стезе умнаго делания.

Радуйся, сладкая струе сердечнаго умиления.

Радуйся, столпе, восходяй терпением к небу.

Радуйся, жезле, поражаяй демонов в бездне.

Радуйся, чистаго сердца обителище.

Радуйся, благия совести покоище.

Радуйся, Божественнаго света таиниче.

Радуйся, прелестныя тьмы прогонителю.

Радуйся, зрительныя молитвы достижение.

Радуйся, слепотствующих сердец просвещение.

Радуйся, отче Льве, старчества оптинского главизно.

Кондак 12

Лучами славы твоя облистай, отче Льве, поющих твоя добропобедныя подвиги, яже в теле на земли соверши, нам же оземленившим свой ум житейским попечением подаждь разум духовный Богу непрестанно пети: Аллилуия.

Икос 12

Ангелолепно скончал еси путь земный, отче Льве, и в райския кущи преселился еси приснославне, на земли оставль якоже другий рай оптинский скит, трудами возделанный твоих подвигов, в немже плоды духовныя вкушающе, ныне вопием ти:

Радуйся, древо плодоносящее вожделенное безстрастие.

Радуйся, ниво гобзующая множество спасающихся.

Радуйся, кедре в егоже ветвех укрышася небеснии орлы.

Радуйся, кипарисе благоухаяй постничества ароматы.

Радуйся, лозо точащая вино умиления.

Радуйся, грозде исполненный Божественного утешения.

Радуйся, крине Ангельского целомудрия.

Радуйся, медоточивый языче отеческих изречений.

Радуйся, мировонная устне исполнь утешения.

Радуйся, миротворче предивный сердец непокоривых.

Радуйся, яко тобою сладости духовныя наслаждаемся.

Радуйся, яко тобою горечи страстей избавляемся.

Радуйся, отче Льве, старчества оптинского главизно.

Кондак 13

О богомудре отче Льве! старчества Оптинского боговдохновенный вождю, избави нас ты воспевающих от плена греховнаго, даждь нам незаблудный путь, ведущий внутрь сердца, идеже есть Царствие Божие, да вшедше в оное, непрестанно поем Богу: Аллилуия. (трижды)

Молитва

О Пречестная богомудрая главо и собора
Старцев Оптинских изрядное и перволепное
украшение, богопросвещенне отче Льве! Тебе,
яко чада отцу, дерзаем приносить сие
акафистное пение, ты же не пренебрези малаго
сего приношения, яко паче должны мы не токмо
пении, но дела ты почествити. Ты бо оставил еси
нам богатство твоего жития богоугоднаго,
в немже яко в зеркале зрится образ
богошественных отцев в подвиге Богу
удовивших. Аще и немощны есмь мы тебе
подражати, но желанием лучшаго от тебе
неотступаем и под крила молитв твоих
прибегаем и яко неключимии тебе вопием:
изгони от нас всякое нерадение, искорени злыя
страсти в сердцах наших гнездящаяся, прожени
бесов на ны непрестанно воюющих, даждь
помощь благодатную, яко силен еси и еще
при жизни твоей бесов прогонял еси и целил еси
всякую болезнь и немощь таящуюся. Сице и в
преднее время посещай ны духом твоим
и жезлом пастырския молитвы твоея порази
волков мысленных стадо твое ищущих
расхитити. Нас же яко пастырь добрый, присно
зови свирелию поучений твоих в Царствие
Божие идеже с тобою по преставлении нашем

вкупе да обрящемся, прославляя Отца и Сына и Святаго Духа в безконечныя веки. Аминь.

